

LIGJ
Nr. 89/2026

PËR DISA NDRYSHIME DHE SHTESA NË LIGJIN NR. 173/2014,
“PËR DISIPLINËN NË FORCAT E ARMATOSURA TË REPUBLIKËS SË
SHQIPËRISË”, I NDRYSHUAR

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Në ligjin nr. 173/2014, “Për disiplinën në Forcat e Armatosura të Republikës së Shqipërisë”, i ndryshuar, bëhen këto ndryshime dhe shtesa:

Neni 1

Neni 7 ndryshohet si më poshtë:

“Neni 7
Autoritetet përgjegjëse

Autoritetet përgjegjëse për dhënien e masave disiplinore ndaj ushtarakëve të Forcave të Armatosura janë, si më poshtë:

a) Presidenti i Republikës për dhënien e masës disiplinore shumë të rëndë “Shkarkim dhe lirim nga Forcat e Armatosura” për oficerët me grada madhore.

Propozimi për dhënien e kësaj mase disiplinore shefit të Shtabit të Përgjithshëm të Forcave të Armatosura bëhet nga Kryeministri, ndërsa për oficerët e tjerë me grada madhore bëhet nga ministri i Mbrojtjes;

b) Ministri i Mbrojtjes për dhënien e masave disiplinore shumë të rënda:

i. të parashikuara nga shkronjat “a”, “c” dhe “ç”, të pikës 3, të nenit 14 për oficerët me grada madhore. Propozimi për dhënien e këtyre masave bëhet nga Komisioni i Lartë Disiplinor;

ii. për të gjithë oficerët e Forcave të Armatosura, me përjashtim të masave për të cilat autoriteti përgjegjës është Presidenti i Republikës, si dhe masave të parashikuara nga nënndarja “i” e kësaj shkronje. Propozimi për dhënien e kësaj mase bëhet nga Komisioni i Lartë Disiplinor;

c) Shefi i Shtabit të Përgjithshëm, për dhënien e:

i. masave disiplinore të rënda të parashikuara në shkronjat “a” dhe “ç”, të pikës 2, të nenit 14 për oficerët me grada madhore;

ii. masave disiplinore të lehta e të rënda për ushtarakët e Ministrisë së Mbrojtjes dhe Shtabit të Përgjithshëm e të strukturave me drejtues civilë të varësisë së tyre të drejtpërdrejtë;

iii. masave disiplinore të lehta e të rënda për ushtarakët që shërbejnë në shtabet e NATO-s, përfaqësitë ushtarake të Republikës së Shqipërisë pranë NATO-s, në organizatat ndërkombëtare dhe në shtabet ushtarake ndërkombëtare;

iv. masave disiplinore të lehta e të rënda për drejtuesit ushtarakë të strukturave mbështetëse dhe strukturave të varësisë së Ministrisë së Mbrojtjes dhe Shtabit të Përgjithshëm të Forcave të Armatosura;

v. masave disiplinore shumë të rënda të përcaktuara në shkronjat “d” dhe “dh”, të pikës 3, të nenit 14 për nënoficerët dhe ushtarët e Forcave të Armatosura. Propozimi për dhënien e kësaj mase bëhet nga Komisioni i Lartë Disiplinor;

ç) komandanti i forcës dhe strukturës mbështetëse për dhënien e masave disiplinore të mëposhtme:

- i. masat disiplinore të lehta e të rënda për drejtuesit e strukturave të varësisë, me përjashtim të oficerëve me grada madhore;
- ii. masat disiplinore të lehta e të rënda për ushtarakët në varësi të tyre;
- iii. masat disiplinore shumë të rënda për nënoficerët dhe ushtarët e forcës dhe strukturës mbështetëse, me përjashtim të masave disiplinore për të cilat autoritet përgjegjës është shefi i Shtabit të Përgjithshëm. Propozimi për dhënien e kësaj mase bëhet nga Komisioni i Lartë Disiplinor;

d) komandantët në nivel brigade, regjimenti, distrikti, batalioni, flotilje, njësie kryesore ose njësie bazë në institucionet arsimore për dhënien e masave disiplinore të mëposhtme:

- i. masat disiplinore të lehta e të rënda për drejtuesit e strukturave të varësisë;
- ii. masat disiplinore të lehta e të rënda për ushtarakët në varësi të tyre;

dh) komandantët në nivel kompanie ose toge për dhënien e masave disiplinore për ushtarakët në varësi të tyre.”.

Neni 2

Shkronja “e”, e pikës 1, të nenit 11 ndryshohet, si më poshtë:

“e) përdorimi dhe lejimi i lëvizjes së automjeteve të Forcave të Armatosura pa dokumentacionin përkatës.”.

Neni 3

Pas shkronjës “b”, të pikës 1, të nenit 12 shtohet shkronja “b/1” me këtë përmbajtje:

“b/1) dhënia e intervistave të paautorizuara në mediat e shkruara dhe audiovizive, në kundërshtim me rregullat e miratuara për këtë qëllim;”.

Neni 4

Në shkronjën “e”, të nenit 13 fjalët “kur nuk përbën vepër penale” hiqen.

Neni 5

Pas shkronjës “dh”, të pikës 3, të nenit 14 shtohet shkronja “e” me këtë përmbajtje:

“e) “Ndërprerja e studimeve”, e cila është masë ekstreme e dhënë për studentët dhe kursantët për shkelje disiplinore shumë të rënda.”.

Neni 6

Në nenin 16 bëhen ndryshimi dhe shtesat e mëposhtme:

1. Në pikën 1 fjalët “me shkrim” hiqen.

2. Pas pikës 1, shtohen pikat 1/1 dhe 1/2 me këtë përmbajtje:

“1/1. Njoftimi i personave që ndodhen në shërbim në Forcat e Armatosura bëhet nëpërmjet administratës së tyre.

1/2. Mënyrat dhe mjetet e njoftimit, në kuptim të këtij neni, janë si më poshtë:

a) njoftimi me shkrim;

b) njoftimi me postë;

c) njoftimi me mjete elektronike.”.

Neni 7

Në pikën 1, të nenit 17 fjalët “me shkrim” zëvendësohen me fjalët “sipas përcaktimeve të nenit 16 të këtij ligji”.

Neni 8

Pas nenit 21 shtohet neni 21/1 me këtë përmbajtje:

“Neni 21/1

Pushimi i procedimit disiplinor

1. Procedimi disiplinor ndërpritet në rast se gjatë hetimit disiplinor rezulton, se:
 - a) shkelja disiplinore e pretenduar nuk ka ndodhur;
 - b) veprimi apo mosveprimi i shqyrtuar nuk përbën shkelje disiplinore, sipas përcaktimeve të këtij ligji;
 - c) shkelja disiplinore nuk është kryer nga ushtaraku për të cilin ka filluar procedimi disiplinor;
 - ç) shkelja disiplinore është parashkruar;
 - d) për të njëjtën shkelje është dhënë një masë disiplinore.
2. Pushimi i procedimit disiplinor vendoset nga struktura përgjegjëse për hetimin disiplinor, sipas përcaktimeve të këtij ligji.
3. Në rastet kur procedimi disiplinor pushohet sipas përcaktimit të shkronjës “a”, të pikës 1 të këtij neni, por gjatë hetimit rezulton se ka ndodhur një shkelje tjetër disiplinore që hetohet nga një strukturë tjetër, dokumentacioni dhe materialet e grumbulluara i përcillen strukturës kompetente.”.

Neni 9

Pas shkronjës “b”, të nenit 23 shtohet shkronja “c” me këtë përmbajtje:

“c) ushtarakët e Forcave të Armatosura ndaj të cilëve është marrë një masë disiplinore shumë e rëndë, sipas përcaktimeve të shkronjave “a”, “b”, “c”, “ç” dhe “d”, të pikës 3, të nenit 14 të këtij ligji, dhe që për një periudhë 2-vjeçare nuk kanë kryer asnjë shkelje tjetër disiplinore të rëndë.”.

Neni 10

Në nenin 25 bëhen ndryshimet e mëposhtme:

1. Pika 2 shfuqizohet.
2. Pika 3 ndryshohet si më poshtë:

“3. Ankimi për masat disiplinore të rënda, të dhëna nga komandantët në nivel regjimenti, distrikti, batalioni, baze ajrore, bëhet tek eprori i drejtpërdrejtë i autoritetit përgjegjës që ka dhënë masën disiplinore.”.
3. Në pikën 8, togfjalëshi “10 ditëve” zëvendësohet me togfjalëshin “30 ditëve”.
4. Pika 9 ndryshohet si më poshtë:

“9. Autoriteti përgjegjës, tek i cili bëhet ankimi, merr vendim brenda 30 ditëve nga data e marrjes dijeni për ankimin. Nëse gjatë procesit rezulton se nevojitet më shumë kohë për sigurimin e informacioneve apo verifikimin e rrethanave, autoriteti përgjegjës mund të vendosë shtyrjen e afatit edhe për 30 ditë të tjera, në përputhje me përcaktimet e Kodit të Procedurave Administrative. Arsytet që kanë sjellë shtyrje të afatit duhet t’i njoftohen palës.”.

Neni 11

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

Miraturar në datën 23.7.2026.

**Shpallur me dekretin nr. 480, datë 5.8.2026 të Presidentit të Republikës së Shqipërisë,
Bajram Begaj**